


LES

## VOEVX DES

Princes, aux pieds  
du Roy.OU LES PROMESSES PAR  
*eux faictes à sa Majesté au Chasteau du  
Bois de Vincenne.*

A PARIS.


Chez Ioseph Guerreau, demeurant devant la  
grand porte du Pallais, pres saint Bar-  
thelemy, au Chapeau Royal.

1617.

Avec Privilege du Roy.

# LES VOEVX DES PRINCE

## *aux pieds du Roy*



Grand Roy, iadis en la ville de Rome il y'auoit vn Temple nommé Pantheon, ou les Images de tous les Dieux de l'antiquité estoient colloquees selon l'ordre de leur dignité & de leur excellence, dans l'enclos de vostre Royaume, dans le pourpris & le sejour de ce qui est de plus exquis, Il s'y voit vn autre Pantheō, ou non des images de dieux imaginaires sont en ordre, mais des portraicts viuifiez de Princes valeureux & magnanimes, qui comme Anges tutelaires de vostre estat viennent aux pieds de vostre Majesté, pour faire preuue de l'intégrité de leurs actions & de l'effect de leurs seruices. Er ce n'est point sans cause, ny sans deuoir : car pour la cause ainsi que l'Eliotrope ne peut viure en la splendeur & en son lustre qu'il ne soit fauorisé des rayons du grand Astre cœleste, ainsi les Princes legitimes ne peuuent viure heureusement qu'ils ne soyent illuminez de la presence de leur Roy: pour ce qui est du debuoir & de l'obligation, vn Prince sans Roy, ( s'il n'est souuerain dessus ses terres ) c'est vn corps sans ame, vn neant, vne bluette, bres vn prodige entre les hommes subiet à toutes sortes de naufrage. Aussi ce seroit alterer son grade & sa condition, & se vœir du tour à l'inconstance, que de quitter ce qui touche de plus pres pour le preferer à l'incertain, ce seroit bannir le remors de sa con-



science & suivre les façons de faire des barbares, qui de tout temps ont guidé leurs appetits au desadvantage de la fidelité. C'est sur quoy se fonda le grand Legislaus pour quitter la gloire des conquestes qu'il auoit faites en Asie afin de retourner en son pays, & de luy tesmoigner l'affection que la nature luy auoit fait naistre: C'est ce qui le meut de s'engager à mille & mille rencontres de l'infortune, sans qu'il fut esbranlé d'autre occasion que du devoir à la patrie. Aussi l'ame d'un braue & d'un genereux croit triompher plus de fois en son infortune recognoissant la protection de son souuerain & le repos de ses compatriotes, que s'il se voyoit releué superbement sur les hauts monts de la felicité, ayant pour obiet à ses imaginations le trouble & la confusion.

Pompee qui par ses prouesses cōquist à bon droit le nom de grand sert d'exemple à ce subiect: car encores qu'il eust reduit sous son obeissance la plus grād'partie de l'vniuers, si est ce qu'il n'estima iamais auoir fait vn acte de remarque & digne de louange, ausques à ce que l'industrie de sa milice en eut acreu l'estenduë de son pays. Ce que Cæsar practiqua avec tant de bonne volonté que tout ce qu'il executa iamais, tant contre les Gaulois, Cimbres & autres nations ne visoit à autre but que pour reduire le tout sous l'obeissance du peuple Romain: bref entre tous les plus vaillās & redoutez de l'antiquité qui se sont delectez d'acquérir de la gloire par les armes, leur intentiō a esté tousiours suivie de ioindre leur lauriers & leurs triomphes à l'enrichissement de la chose publique, preiugeant que s'ils laissoient à la posterité quelque marque de leurs bien-faits, qu'ils seroient

enroolez sur les Catalogues & Calandriers, ainsi que l'on auoit accoustumé de faire à Rome pour ceux qui ne s'estoient point espargnez à procurer le bien public. Grand Roy, les faits & les gestes de ces braves Capitaines sont autant d'exemples pour aiguillonner vos Princes & subiets à ce qu'ils sont portez de leur nature, l'honneur & l'amour que le peuple leur portoit pour l'integrité de leurs actions, leur seront autant de phares & de flambeaux pour les conduire au grand sentier qu'ils recherchèt tous les iours & qui plus est, la valeur de leurs courages fera naistre à l'aduenir tant de dementirs cōtre les partialistes & factieux, qu'avec la iustice de leurs deportements leurs desseins qui sembloient audacieux renporteront à front ouuert le prix & le los de leur merite: Au reste Sire, ce sont des Aigles en grādeur, des Liōs en courage pour deuorer vos infidelles, & des Agneaux d'humanité pour tesmoigner leur obeissance, & combien que leur esloignement & leurs armes ayent intimidés quelques simples de ce temps, si est ce que le but de leurs intentions n'a iamais visé qu'à l'aduanage & à l'asseurāce de vostre estat: aussi leur bon naturel qui les guidoit ne pouuoit leur permettre aucune entreprise qui les peut faire nommer à iuste cause rebelles à vostre Majesté ny perturbateur du repos public, ioinct d'autre part que tacitement vous les faisiés retenir en leur deuoir, comme ceste pierre d'Aphricque nommé Liparis areste toutes sortes d'yeux par sa beauté incomparable.

Neantmoins quoy que le manteau de leur innocence estoit visible eomme le Soleil entre tout les citadins cōlestes, on n'a pas laissé d'emouuoir vostre



Majesté à des soupçons de grand preiudice, & ces Princes d'autre costé qui ne recherchoient dans l'obscur de ceste imagination populaire que la grandeur de vostre Couronne, & la franchise de leur liberté, ne sçauroient trouuer des moyens plus legitimes pour les exempter de vostre courroux, que la iustification de leurs actions, qui estant bornees de fidelité se sont veues claires & liquides cōme l'Aurore.

Ce seroit donc vn' erreur pour le iourd'huy si l'on tournoit à blasme & à mespris tant de bons offices que les Princes François ont procuré à l'Estat & à la Couronne : L'entreprendre ce seroit mettre la bride sur le col à ce Cheual indomptable de l'Ame que Platon estimoit estre les effrenees passions qui nous aueuglent, ce seroit comme Empedocle se precipiter dans son desastre, & chercher son tourment perpetuel : ce seroit, dis-je, faire comme vn torrent deserré qui se débonde pour rauager éperduëment le calme de nostre repos, Ouy les bons François le croient ainsi, car leurs affections qui sont esgales & bornees comme les poincts de Marhematique ressentent si bien ce qui peut estre de la necessité du temps qu'elles donnent congé à toute autre sorte d'objects pour s'arrester à vne seule & constante habitude. Aussi puis que rien n'est sorty de ses limites, & que tout suit la piste du debuoir, Il n'est pas besoing de pratiquer les desdaings de ceux qui desireront nous fauoriser en toutes sortes d'ocasiōs si nous ne voulons estre accusez d'ingratitude, & remarquez plus criminels que n'est la source du crime mesme. Telle est mon opinion & ma creance, & pour rien n'y voudrois degenerer, pour complaire

aux appetits de ceux qui sous feinte simulee semblent adorer la conseruation de cest Estat : car il se trouue tant de personnages de ceste condition & de ceste volonté, qui sous pretexte de ce qui s'est passé, desireroient esbranler vostre Maiesté à des efforts, dont l'issüe n'en pourroit estre que tragique, pour par ce moyen se faire esleuer aux despens de l'infortuné d'autrui : Je crois, Sire, que vostre Majesté en a peu recognoistre quelques vns par les apparences de leurs infidelitez : car estans venus se ieter à vos pieds les larmes aux yeux, le soupir à la bouche, & au reste dans le cœur l'ambition grosse & enflée, qui ne demandoit que l'heure d'apostumer. Il est impossible que le pinceau de vostre esprit ne les ayent crayonné sur le rang d'un souuenir qui ne peut leur rien promettre que le salaire de leur perfidie.

L'on me dira, que ce qui a esmeu ces pauvres simples à donner des aduis à vostre Maiesté suiuant ce qui se passoit entre les Princes, ne procedoit que d'une sincere affection & d'une entiere fidelité : Mais quoy ? comme disoit vn sage de l'Antiquité, *Le conseil d'entreprendre quelque chose est donné de plusieurs, mais quand il s'agist du peril & de l'infortune peu s'approchent de leur aduis, ains les fuient & les esuintent le plus subtilement qui leur est possible.* Neantmoins, Sire, on n'a pas manqué de publier que l'on vouloit deposseder vostre Maiesté de son autorité, que l'on leuoit des troupes pour cest effect, & que peu à peu si l'on n'y donnoit ordre, que vostre Royaume seroit reduit en autant de partages qu'il estoit du temps de nos premiers Rois, & qui plus est, causant de l'alteration



aux opinions de la populace l'on a fait courir vn  
 el murmure de guerre, de sedition & de clauage,  
 qu'il sembloit que cest Estat ne tint non plus que  
 espee de ce Tyran dont il est parlé par le Poëte  
 yrique.

Que cela soit ou qu'il ayt esté, il n'importe quād  
 present, si l'on a calomnié, comme il est vray, ce  
 est pas d'auourd'huy que l'on pratique cét exerci-  
 e malin entre les hommes: nos deuanciers en ont  
 ayé la piste & le chemin, & si bien parueniu à ce  
 ut desespéré, que par ce moyen diuers desastres ont  
 ris naissance au detriment de leurs entrepreneurs.  
 e qui se void assez clairement dans l'Histoire Ro-  
 maine par les conspirations d'vn Sylla, d'vn Brutus,  
 d'vn Pompee, lesquels pour paruenir à la visée de  
 urs desseins, ourdissoient les vns contre les autres  
 s trames d'infidelité, & au Senat publicquement  
 representoient leurs actions avec tant d'apparen-  
 s d'animosité, que de là n'en reüssisoient que des  
 assassins ou des émoions populaires tendantes à des  
 terres ciuilles: bref, s'il est questiō de verifier l'im-  
 rtinence des hommes par le moien de la calomnie  
 ont ils ont vsé comme idolatres, le blasme que Ca-  
 n d'Vtique reçeut pour auoir fait le deuoir aux fu-  
 railles de son frere sert d'exemple suffisant, com-  
 en qu'il estima luy estre vne louüange. Si bien que  
 ste vipere a fait de telle sorte glisser son venin, que  
 uention & l'industrie des plus zelez à la concor-  
 n'a de rien seruy que pour luy donner de l'aigreur  
 plus en plus, comme en la playe inueterée au plus  
 y apporte de remede, au plus fait on accroistre la  
 uleur, Mal-heur neantmoins auquel les Princes

souuerains qui sont secondez de la grace diuine doiuent preuoir à leur aduenement pour tenir toutes choses en leur estat & les priuer de combustion. Ce que sçeut fort bien pratiquer le grand Alexandre apres la mort de Philippes de Macedoine son pere pour tenir la Grece en sa protection, & en chasser les Barbares qui la vouloient vsurper. De maniere, Sire puis que vostre esprit penetre tous les nuages iqui se pourroient former pour la mesdiance, & que vostre autorité les peut dissiper, c'est à ce coup que la raison doit estre la guide, ou la puissance d'un costé, & le respect de l'autre seront conduits pour faire hommage à la paix & à la tranquillité.

Tel est, SIRE, le desir de tous vos Princes, ne souhaittant rien moins que les fatigues plus desauantageuses que necessaires, Vostre Maiesté en voit les preuues, & de tesmoignage plus certain la continue de leurs presences y seruira du tout aussi s'assure-on tant en vostre debonnaireté, qu'ils n'auront iamais d'autre subiect que d'agir & d'executer en qualité de vos tres-humbles.


D. P.

---

### *Extraict du Priuilege du Roy.*

PAR lettres patentes du Roy, il est permis à I O S E P H G U E R R E A U, Imprimeur & Libraire a Paris, d'imprimer & mettre en vente vn liure intitulé, *Les vœux des Princes aux pieds du Roy*. Avec inhibitions & deffenses à tous autres d'imprimer ou faire imprimer, vendre ou distribuer ledit liure sinon du consentement dudit Guerreau, & ce durant le terme de deux ans, sur peine de confiscation, comme plus ample ment est contenu & déclaré esdites lettres; car tel est nostre plaisir. Donnée à Paris le 9. iour de May 1617. Et de nostre regne le septiesme. Par le Conseil, Signé. P E R R E A U.





Digitized by the Internet Archive  
in 2010 with funding from  
University of Ottawa

